

# Chong Eu janji kerajaan akan kerja kuat

PULAU PINANG, Khamis — Ketua Menteri Pulau Pinang, Dr. Lim Chong Eu, berkata Kerajaan Negeri akan terus bekerja keras untuk membawa pembangunan dan faedah yang lebih besar kepada rakyat dalam usaha meningkatkan taraf hidup di negeri ini dan negara seluruhnya.

Dalam perutusan tahun barunya hari ini, Dr. Lim berharap rakyat akan membaharui keazaman dan dedikasi mereka bagi memperkukuh serta mengekalkan pencapaian yang dibuat dalam dekad yang lalu.

Beliau juga meminta rakyat dari segenap lapisan hidup terus menunjukkan semangat muhibah di samping mengekalkan keamanan, keselamatan dan kestabilan yang wujud sekarang.

Ketua Menteri menegaskan adalah penting bagi rakyat menghargai sepenuhnya matlamat Dasar Ekonomi Baru dan berharap mereka akan terus meningkatkan kerjasama dengan Kerajaan Negeri.

Katanya, di bawah pimpinan dan bimbingan Perdana Menteri, Datuk Seri Dr. Mahathir Mohamad, Pulau Pinang akan mempertahankan perkembangan dan pertumbuhan sosio-ekonominya melalui pelaksanaan projek-projek yang telah dikenalpasti dalam Rancangan Malaysia Keempat.

Di Melaka, Ketua Menteri, Encik Mohamed Adib Haji Adam, menyeru kakitangan kerajaan dan sektor swasta serta rakyat jelata supaya menanamkan semangat baru untuk bekerja keras dalam meningkatkan pencapaian mereka selaras dengan dasar Kerajaan sekarang.